

CODOSASIY JANVAMYUJURA CATERA

Pávurubay mūchūveda riy Codósasiy janvavyedabay

1 ¹⁻²Ray Pávuru rañicha Jesucristu nusūbyi Jūdenu vatadamu. Namyūchuvay jita ratyeryi Timutévuta jirye títaju jiryatyi Crístumu tuvāchuvay jiryevyichasara Codósasiy vichadamu, jiryatyi jiintyasavay Jūdenuju daryaju jirye. Samirya vichasada racha jiryejyu Jūdenumu, samirya racha jiryejchintyi Vujye Jūdenu vatadamusiy.

Sīchanatyada Pávurubañi Jūdenu rinchiy Codósasiy janvavyedabay, Crístumu tuvāchuvay

³Nañichanatyani Vujye Jūdenu, sadenu Jesucristu jarye yisaju, jiryatyi Vuyntyityūni, varityi najechiñujeyasara siva jiryejadaju. ⁴Natyuvāchuma daryaju jiryenchirya samirya jaticheyada jiryatyi jiryetyuvāchuma simu Jesucristu daryaju, daryadantyi jiryatyi jiryevyata riy títaju jiryatyi jiintyasavay Jūdenuju riy. ⁵Jiryatyi jiryetyuvāchuma daryajura sītenu samitūchoda, jiryedyetyama variy ranchiy jiryatyi sabayada Jūdenu ruryajijura samiy vichasada jarichuvimu. Ramuniday jiryejyotada nutuyadara sisaju vichada, jiryetyuvāchodama daryaju simuntiy. ⁶Munaty Rundamusiy jita, jiryetyuvāchodanumatirya Vujye Jūdenu niquejada, jiryedyetyadama

variyy sītenu savatādanchiy, rajotada jvaayada variy jiryejchimy, rasayada títaju jiryequebyimuntiy daryanuma ravichasara títaju mucadiva. ⁷Jiryedyetyamara jirya títaju simusiy Epájurasiy, nītiy vichasara Jūdenu muchechiy, nūdyisa jvaañu, jaryi vūvyatasi. Nīni vichasara Crístu jmūtyi jiryejadaju. ⁸Epájurasiy jita jtītada nūdyimura samirya jaticheyada jiryenchiy jiryatyi jiryevyatasara Jūdenu Jnutumusiyu.

Pávurubay tūchoda sisā Jūdenu riyadaju

⁹Ramunītiy nūtyuvāchodivasirya, ne nūpyaruryūy tūchoda sisā Jūdenu jiryejadaju variy. Nūjechiñuy siva sātīdye mūchanirya jiryejchiy jidyetyadada, jiryatīdye jvaajeyasarara savatasara, Yintu datyadodamusiy. ¹⁰Nūjechiñuy jiryejadajuntiy jiryavichasara nūtyu sasiityarivay samiy jvadichavay, vinu savatasaraju. Títaju jiryivaayadamu jiryajvaacharara jiryatyi samirya Jūdenu diya darya, jiryajasachura jiryedyetyada Vujye Jūdenunchiy. ¹¹Samā vanūtya jivyanūyadata jirye jiryatyi jaryi vanda darya, jiryatīdye jachīntya parūcharimyusirya jarupantasa, jiryīchanayadamu. ¹²Rajechiñuy jiryejadaju, jiryatīdye datya jchanatyadani Vujye, jiryatyi sadirya nīrūyadata yasay vuryeyarūrya vanda Jūdenu rundamu vuy, rusā títaju

jiryatiy sajū jiintyasavadyeryi.
¹³Sasipyatama Jūdenu
 nupocudinubesivyuy, bayantu
 nusuyadamusiy, sajatada varyi jidyenu
 nusuyadamuju vuy, jaryi vatasi
 daryajuni. ¹⁴Sadenu Jesucristu
 diiyadata sasipyatada
 vujyuuchuedamusivyuy, sandaja
 rubedata jarye jipyuyadara
 vujyuuchueda.

**Crístu batyedata saratyanusara
 Jūdenu yisaju vuy**

¹⁵Nini vichasara santyasi Vuryindenu,
 nitimyu ne jvadichi nijyanvay nisimyuju
 dañi, Crístu jita vichasara munaty,
 titaju sunderajisiy. ¹⁶Crístumusiy
 suñdejada titajura jiryatij jarichuvi-
 mura, mucadiva jarye, dantyamuy ne
 jvadichara vujyura jiryantij jiryatij
 titaju jvadichara darya. Suñdejadantirij
 jamu nutyityūveda, nusuyve, bayantu-
 veda, japuveda jarye titaju. Rundayada
 titaju simusiy, sajū titaju day. ¹⁷Nini
 jotada vichada rajisij titaju judesara,
 simusidye rasurujeyasarantij.
¹⁸Savichasara Crístu vuryino, jiryatij
 sadirya natuchavadyevyuy. Titaju
 sasiityarivajyuu vicha nutyu savu. Nini
 vicha vumyunaty jiryatij samisasubeda
 jotada diibyimusiy, satidye vichasara
 titaju jiyanti vujyu. ¹⁹Savatada Vujye
 daryaju jidyenuju: Jūdejada datyada
 rachasara miryanra simu. ²⁰Simusidye
 saratyanu Jūdenu yajiju titajuntirya,
 jiryatij rarubeda Crístu nudaja
 crusimyu vuryeyadaju. Ramusiy
 saratyanu Jūdenu yajiju titajura jiryatij
 mucadivara, jarichuvimu jarye risaju.

²¹Jirye jerye, dañuma jiryeni
 vichanuyada ripya sajisij Jūdenu,
 jiryevyichanuyada samityasimiyintij
 nicyaray jvaayadiva. ²²Saratyanuma
 yajiju diye jiryentyi, savu diiyasarata,
 jiryatij samunusada Crístu

vuryeyadajuy. Sūntatya Crístu varyi
 Jūdenu diya vuy. Vuryecha samivye
 satuunu varyi, ne juuchataway, mitya,
 ne jiyasachavay varinudavyuy.

²³Sanumatij ratyanu vuy, vuryecha
 surravay vujechipiyajadamu nutyu
 jutuvu sityasara nicharij, netimyu ne
 vuchiquitya vuyntuyadamu.
 Jiryetyuvachodanumatirya samituchoda
 Crístunchij, jiryentuyada varyi sajiju
 vuryeyada rañu. Titaju judesavay
 jiryatij jarichujare vichavaryi,
 rityuvachuma daryaju darya samij
 niquejada day, jiryatij ray Pávuru
 rimutya tuchoda Jūdenujura.

**Sabayada Jūdenu ni Pávurubay,
 Crístu siityarivay jmutyisij**

²⁴Diye rīchanatyara rapyarutyasada
 jiryeyadaju. Ritotaniryuy ravyumu
 daryajura saparutyasada Crístu
 jichiityarivajyuu jiyadaju, jiryatij
 rasutye riyada rayadaju. Vuryitarya
 savu, sasiityarivay. ²⁵Ray rañicha
 Jūdenu jmutyij jiryatij sabay jiñiquejada
 tuchodaju ray, ranumatij jotanimyurya
 miryanra saniquejada. ²⁶Ravichanuyada
 dutyasara ratera tarij. Ne vanay
 ridyetyanuyada vumyunatyavarya. Diye
 jita sadityanu pariche Jūdenu ruumura,
 jiryatij sajaryetavaryi. ²⁷Sadatanuruy
 varivyuy ta jaryi samirya radá, jirya
 datyadodadá ruumu jiryatimyu ne
 Judfyūveda daryi, jiryatij
 ravichanuyada dutyasara jirya
 datyadoda day. Vudyetya jita ramusiy
 nutyuramusiy savichasara Crístu
 vuryimuju, nutyuramusiy, vuryatidye
 saryera sadanuyajada yisaju day.
²⁸Sanchij jita nujechipiyatanirij nuñi ti
 nijyanvay, nudyetyanu miryanra
 datyadatantirij, nuñatidye jnutatya
 Jūdenumu titaju riy nijyanvay, jiryatij
 jamyiñuma Jesucristumu titaju daryi.
²⁹Ramuju rivaayasumij

parūcharimysiy savanūtyādata, ratatiy savanūtyajayā jidyetyādata rimu.

2 ¹Ravyāta jīta jiryādatyara tā jaryi parūcharimysiy rivaachara jiryeyadajū, Davudisēya janvajyū jiyadajuntiy, riyadajuntiy tītajū rityimyu ne diy riva didye. ²Ravyāta daryajū jiryēcha vanūtyasavay jiryējehimyu, jiryatiy santyeranityadedā Jūdenura jiryējehiy mityiji jiryevyāṭadamu, ṣatidye mūchanirya jiryējehiy samirya jachipiyājadata, jiryātidye datya variy nūtyuramusiy savichasara Crīstu Jūdenū datyāda, nūtyuramusiy, jiryatiy ravichanūyada dutyasara nijyanvajyū. ³Sadutyānūyada Jūdenū daryajū Crīstumu tītajūra jidyetyāda, mityamusiy jachipiyājada jarye risajū. ⁴Rītay daryā riñuma quivūchu tavay sabodeda niqejadāta jiryē. ⁵Dantamūy ne rañcha jiryēquebyimu, ravyichasara jiryisā rīntuta. Rīchanay jiryatiy radyi samiy jvaavye jiryiva, surra jachipiyāvay jarye, jiryatiy jiryējehipiyasara sanijyū Crīstu. ⁶Daryatiy jiryējehipiyājada sanijyū Jesucrīstuntiy jiryātidye tuvāchu simu jiryeyada rāñūjū, daryanīday jiryājachipiyā sanijyū, ṣatidye jmūtyasara jiryevyichadedamuyu. ⁷Jiryāmā vichasara nūtyu nutasara, rajūura jnutijyūutara, nūtyu jutuvyū jsityasara surūvye Jesucrīstumu, jiryatiy jiryējehipiyasara sanijyū ṣatidye vanūtya jiryējehipiyājadamuyu, rajasay jiryīchanātyāda sanijyū varintiyi.

Vadi vichasāda Crīstumu

⁸Jiryājnūtya riryājisiy vaduy mitya quivūvyeyu. Ricyarerūy samiy niqejadāta jiryē, jiryatiy riñique nijyanvay datyādatara, mitya quivūchutā, varimiyata bayantu datyādata, jiryatimyu ne Crīstumusirya darya.

⁹Crīstu vūmu jīta savichasara Jūdenū tītajū miryani. ¹⁰Jiryē jarye vichasara miryanīveda Crīstumu, nīnī jīta sanīcha jiyanti rīquebyimu nusūvye, nutyityūveda cabyimu jarye. ¹¹Crīstumuntiy jiryevyichasara jmutyonusavay, ne nijyamī jomututa, jiryatiy sumutyonu Crīstu Jūdenūjū jiryē, sajiintyādanumatiy jiryājisirya jiryevyū nīrūyada. ¹²Jiryevyichasara nūtyu jmūchusavay sisā Crīstu jiryītyūñumatiy sītyamu, (daryatiy riityūñūyada nijyanvay siirīñūmu, jiñāmu). Jadchintiy jiryemyisāsūbedā nta sisāntiy jiryējehipiyājadata, jiryatiy jiryējehipiyā Jūdenū vanūtyāda nijyū, ratatiy samīsāsūmityadedanī Crīstu dīibymiy cabyimusi. ¹³Ne jiryīnūy, jiryevyichāda diiyasavay jiryeyūuchūvedacōsidye jiryatiy jiryevyichanūyada jivyū nīrūyadacānumiy. Diye jīta sunūyasumityaniy Jūdenū sisajū jiryē, jiryatiy saramityanirya jiryeyūuchūveda tītajū yiva. ¹⁴Sapūyada daryajū Crīstu tītajūra tūchutāda jiryatiy vuryeyarōjū, jiryatiy riyasayada tavavyūy. Sapūcheda vuryājisirya tūchutāda, jiryatiy rūvay crusityāsa variñī Crīstu, sabatyeda variy vūtyūchutasāda jiyadajū. ¹⁵Ramuti sasōvedara rūvatyā yimusiy nusūvye, nutyityūmimysiy jarye jiryatiy rivyichanūyada vuryeyarōjū. Sadityadoda vijyōmujache varirya riryāntadedā, savuudoda rata riy bayantuveda.

Jiryāvata ranācho jiryatiy samirya Jūdenūmusirya dārya

¹⁶Ne jiryātūchutatanīy tī jiryeyarōjū, dantamūy ne jiryībyedanchiy, dañimūy ne jiryātodanchiy, daryantamūy ne ranchiy jiryatiy jiryivaaryūy vichtya rundamura,

dañuma racha nuñi tanijyaquimusiy, varimiyata nuñi tiqui jarimyunimusiy, varimiyata nuñi taraqui simyanumusiy. ¹⁷Sabayada Jüdenura nutyuramusiy vuryajvaachara vichtya rundamu, nutyuramusiy. Sabayada nutyu jantyasara vujyura. Ravichasara vinu nutyu Cristu Jnutu, riryatidye jachipiya nijyanvay sanijyu: Nutyura racha savumu sitenu riyada ráñu, nutyu. ¹⁸Ne jiryasovatyaniy yajisirya jiryecyanarya Cristumu, daryatiy richabodeda tavayu, rijechipiyasara variy riñijyu Jüdenu tuunu vichavantiy. Runnuvay ramuyu jiryatiy riñi diy tariva, ramachojada mitya runnuvayada jidyetyadamuju. ¹⁹Ne ruriryuy saniy vuryino jiryatiy Jesucristuni, simusiy jiryinuy vuvyichasara nutyu savu, titaju jiryatiy vuchiityarisara ni Cristu. Vuvyichasara povyemyi simusiy, puchusavay jarye, nutyu puchusarara vuvyu vujyuuata vuryivichimyu. Rajavyechara mityiji vuvyu tera variy jiryatiy sajavyechu Jüdenu jidyetyadataru.

²⁰Jiryetyi rañi diiy Cristusa rajisiy bayantu datyada, ¿taraju jiryechabuy variy nutyu jiryevyichasara nusuchavay nta mucadi janvay jtedamu, taraju? ²¹Ruteda daryaju: Ne yajvaay jiirya, varimiyata: Ne yajantya didyerya, varimiyata: Ne yejirirya. ²²Ne jiryinuy rabaryi titaju nuñumatiy çasirya. ¿Tarajura vuryatuvachu variy ramu nijyanvay jteda, ridyetyadoda jarye risaju, taraju? ²³Samirya jvadiclara dyetya darya jvaayada, jiryatiy richanayta nani Jüdenu variy, richabodeda jaryivyajura jivyuntiy. Ne rasaranta, tii, mitya, vuryatidye paruy riva vuvyu nirurya.

3 ¹Jiryatiy jiryeni misasubeda Cristujsa, jiryama vata ranacho jiryatiy navadyerya, jasityi samasa Cristu Jüdenu nutyityudamyuju.

²Jiryama jachipiyasara ranijyu jiryatiy navarya, ne jiryatiy mucadivara.

Tariy vichasada, vadi vichasada jarye

³Jiryatiy jiryedyiimya Cristujsa, dutyasaranumara jiryinuyada Cristujsa Jüdenumu day, ne vanay sasovay ti jiryajisirya. ⁴Sanumatiy muti Cristu, nitiy vichasara vuryinuyada, (simusityi vuryimutyara vuryinuyada), sadityanulara Jüdenu variy sisaju jiryentyi, vandamuju.

Tariy vuvyichanuyada juuchuveda cabyiva; diye jita vuvyicha vadi vichasada cabyivantidye

⁵Ramuni jiryamunu jiryimura jiryivaayada rapurya, jiryatiy jirya mucadimu vichadamusidyerya, jiryatiy nutyu cadnavedara, jamirya vichada jarye risaju, nicyaray niruyada, ranijyu jachipiyasara risaju; jadchintiy, jiryamunu jiryimura jaryi tarati vicharuyada, jiryatiy vube vujechimyu Jüdenu jubivajura. ⁶Vudyetya daryaju, rajti Jüdenu niqueyada rayaraju darya jvaayada, jasityi samurichenutaniriyi rityi jvaacharara darya jvaayada. ⁷Jiry jarye rupiñuyada darya jvaayadacanimiy tariy, jiryevyichanuyadanumatiy variy ramu. ⁸Nuye jita jiryanuma jatya jiryitosirya niqueyada, niqetyada jarye risaju, nicyaray jvaayada, javityiyeyada, jamiryamu niquejada jarye titaju risaju. ⁹Ne jiryaquivuchu nuñi jiryeyu, jiryatiy jiryetyama yajisirya tariy jiryevyichadeda day. ¹⁰Jiryimutyama daryajura vadi jachipiyajada day, jiryatiy savadinunuma Jüdenu vuryimura, vuryatidye datya vuryimuni Vuryindenu jantyasi. ¹¹Vuñumatiy vichasara santyasimiy, ne vuryidyetya vunquebyimu variñuday chira sanicha may, chi, dantyamuy ne nutyityu, ne vinu cumudemiy. Vuvyicha jidchavuj

variý Crístumu títajú, jiryatiy sáchasara vuryiva títajú.

¹²Jiryatiy jirjevychasara Jüdenü jaryetavay, jiintyevye jarye sajú, jiryatiy savatasara jaryi jiryentyi, jiryamã jachu nütü sujay vadijaj jiryivara jantyutyada, samirya jachityavay vichadajú, tapimusiý jachipiyajada, mityamusiy jvaayada, tapimusiý jachideda jarye risajú. ¹³Şanumatij jiyasay tíqui jiryetyenuní jityenu, samã jachiniyu, samã ramityaniy mitya sivantirya. Daryatiy saramityadeda Crístu vuryivasirya vüjyuuchvedantidye, daryaniday vuryaramityaniy nuñi tíquimusintyidvevyü. ¹⁴Ranchajuntij jiryamã jachura Jüdenü vaçada, ramusiyi jiryentyeryaniy jityojomuyü, taraqui jachipiyajadatavay. ¹⁵Ramã nusuchara jiryejechimiyura samirya vichada Crístumusiý, jiryatiy sanatuyada Jüdenü ramujú jirye, jiryatidye vichasara samivne tavaqui miryanuvay. Jiryecha jchanatjavay sanijyü variy riva. ¹⁶Ramã vichasara Crístu niqejada miryanra jiryejechimiyü, jiryeñumatiy datyanu nuñi tíquimusiyü, jiryeñumatiy vanütvaniy Jüdenü datyadamusintiyü. Jiryedyetyadoda, jirye vanütvyadeda jarye racha murrayadamusiý, ratatiy jiryajchanatvani Vuryindenu jiryichanayadamu. Jiryamã murray Jüdenunijyü jiryejechimiyusiý, jiryatidye tuchujayasarara samiy niqejada sanijyü. ¹⁷Títajú ratiy jiryivaay, varimiyata jiryeñiquejadata, daryantya jiryivaayadamu, jiryamã jvaay Vuyntyityü Jesús jtyamu títajura, jiryajchanatvani Vujye Jüdenü simusintiyi.

Nutyichiy vuryecha samirya vütynuta, nutyichiy

¹⁸Jiryamã tuvachu, vatuvyeda. Jiryamã siitye sajú jivyanu, daryatiy

samiy jvadichara Jüdenü diya dárya.

¹⁹Vaduy jarye, jiryamã vatasa riy jivyatuy, ne jiryavichaniy jivyara jachipiyajadata tara riy jivyatuy.

²⁰Deramiy, jiryamã tuvachusara títajú jijyemyü, tapi raní jita Jüdenü jacharajú day. ²¹Deramiy jamyi, ne jiryajota jiyaroju riy jidyedyeñü, riñuma paruy riva samirya vichada.

²²Cumudemiy, jiryamã tuvachusara ramu títajú jiryatiy vuryajtachara jiryepyatrüveda yivara. Dañumamuy ne riñicha Jüdenü siityarivay, jiryamã jvaachara samirya jachityavay rijyü, ne vinu riryatidye jachipiyã samiy jvadichavay jirye, riryanutimatiy jnuchu variy jirye. Jiryecha samirya jachityavay jiryatiy jiryechuvuñi Jüdenü daryajú, nitiy datyara jiryepiyatuyada títajú. ²³Jiryamã jvaay yicanuyadamura yivaayada, jiryatiy nütü Jüdenü nta ránicha, ne vinu jiryepyatrüvedajura jiryatiy nijyanvadyeryi. ²⁴Jiryedyetyisatya daryajú vuryajmutya Jüdenü jtedamüsirya vuryerarurya, jiryatiy sasay vütüvüvachoda murichirya vüy. Vüvyichasara Vuyntyityü Crístu muchechimiyi daryajú. ²⁵Nicyaray jvaave rajmutyara ramurichenusadantiy, jiryatiy samurichenutanichara Jüdenü nuñi tíquimusiyi şitenu ruvaayada murichiryantiyü.

4 ¹Patrüveda, jiryamã vichaniy vase riy jicymudemiy, jiryecha samirya jachityavay riñijyü, jiryeñi datyisatya daryajú jiryatiy jiryeñicha patrütavantidye, jiryatiy jarichumu vichini.

²Jiryamã jiriryira Jüdenü şã tuchoda, ne jiryaparuy riva yinütvyada bayantujisiy, jiryamã vicha vanira jachipiyavay, dantyamuy ne jiryaparuy riva Jüdenü jchanatvyada. ³Ne jiryajachipurya tuchoda Jüdenü şã nüdyeyadajuntiy, şatidye mantya Jüdenü nuñajijü

ramusiy, nuñatidye tuchura sanique-
jada, nuñatidye tuchu vijyomujachera
samituchoda sanchiy Crístu, jiryatiy
ravichanuyada dutyasara.

Ramuní ravyichasara tanuvunusi
ratyuchodiva. ⁴Jiryajachiñuy siva,
ratidye datyanu vandara Jüdenu
niquejada daryatiy savata raniquera.
⁵Jiryama vichasara datyavay riñijyu
jiryatimyu ne Jüdenu siityariivadyeryi,
jiryayuma jiryi yimujuntirya Jüdenuju
tuchodantiy. ⁶Jiryama datya tuchoda
samirya, nutyu jmyichara jaryenusara,
riryatidye jucanuy tuvachoda tavarya,
jiryatidye datyantiy nutyuramusiy
jiryajmutyani nitiy rajtajanu tariva
jiryey, nutyuramusiy.

Samuchuvacheda Pávurubay jiyataju riy

⁷Sadatyataniy Tíquicu jiryerya titaju
jiryatiy jiryedyetaryuy raynchiy. Nini
sanicha vutyeryi jaryi vatasí, risa jvaañu
jarye, jiryatiy sumutyasara siityera
Jüdenuju jvaayadamu ray. ⁸Ripajasiy
jiryimu ni, satidye datyataniy nunchiy
jiryey, savanutyaniy jiryejechimyuntiyu.
⁹Ripa sisantiñi Onésimyuntiy, vutyeryi
siityera, jiryatiy jaryi vatasintiñi. Nini
sanicha jiryeryenay, Codósasimiyusi.
Danujumyusiy nanatuchu jiryivara
titaju jiryatiy nuyvicha jiyu.

¹⁰Samuchuvay risa tanuvunusi
jiryentyi, Aristyáruco jtyati.
Samuchuvay Márcuntiy, Bernabé
taryivichi. Jiryimutyamara riteda
sanchiy. Sanumatiy jutí jiryimu, jiryama

dirye samiñi. ¹¹Jadchintiy Jesús, jiryatiy
rutachara Jústu ni. Vinu jivyey vichasara
Judíyuvoda risa jvaavyetye, jiryatiy
nudyvivaay Jüdenu nusuyada
jtotadedaju. Rumutyada rajuuramu ray.
¹²Samuchuvay jiryetyenu Epájurasiy
jiryentyi. Savichasara Crístu muchechi-
ntiy jiryatiy sajachiñujeyasara siva
Jüdenu jiryeyadaju, jiryatidye raniy
surramu, jiryintumu javyevye, Jüdenu
vatadamu jarye titaju, jiryatiy
savatasara jiryey. ¹³Ratyuchu jita sanchiy
daryaju, sivaachara parucharíy
jiryeyadaju, riyadajuntiy jiryatiy
Davudiséya janvaryi, Jiyerápodisiy
janvay jarye rusaju. ¹⁴Samuchuvay
Dúcasiy jiryey, nitiy vuryindanu jaryi
vatasí; Démasiy jarye muchuvay
jiryentyi. ¹⁵Jiryama muchuvay nujyu
riy vutyeryiveda Davudiséyamu
vichavay. Jiryama muchuvantiñi
Níjasintiy, rijerye jiryatiy rintyeryaniy
sarorimiyuyu. ¹⁶Jiryeniquettanumatirya
racyatera yimuju, jiryeniquettatata
Davudiséyamuntirya. Daryaday
jiryaniquettantirya racyaterantiy
jiryatiy jiryajmutya Davudiséyamusi-
ntyirya. ¹⁷Jiryatuchu siva Arquípu:
Yajnuj yajvaamyurya jiryatiy yimutya
Vuyntyityumusiy yivaayadajura.
¹⁸Ramyuchuvay rajyomututa caterava
jiryey, ray Pávuru. Jiryajachipityara
ratyanuvunusada. Ranuma racha
Jüdenu jmutyada jiryisa.

Sayanuma
Pávuru